



Inuussutissarsiutigalugu aalisartunut piniartunullu inuussutissarsiutigalugu umiatsiaararsinissamut inuussutissarsiornissamut tapiiffigitittalernissaat siunertaralugu, Aalisarnermik piniarnermillu inuussutissarsiutillit inuussutissarsiorterannik siuarsaaneq pillugu Inatsisartut inatsisaata allannguutissaanik Naalakkersuisut siunnersuuteqarnissaannut peqquneqarnissaat Inatsisartut aalajangiiffisassaattut siunnersuut.

(Inatsisartunut ilaasortaq Jens NapätôK', Naleraq)

(Siullermeerineq)

Inatsisartunut ilaasortaq Jens NapätôK'-p siunnersuutaanut Demokraatit aallarniutigalugu qujarusupput.

Sinerissap qanittuani aalisartorpassuit, piniartorpassuillu unamminartitaannut paasinnittorujussuuvugut. Ilungersunartunik atugassaqlutik suleruluttarput, suliffeqarnermullu aamma ataatsimut aningaasaqarnitsinnut aalajangiisuulluinnarlutik. Ilutigisaanik sinerissap qanittuani aalisarnerq, piniarnerlu kulturikkut kingornussatsinni aamma kinaassutsitsinni pingaaruteqaqataapput, tamannalu pillugu inuussutissarsiummi tassani naleqquttunik, piujuartussanillu atugassaqartitsinissarput inuiaqatigiittut qulakkiissallugu pissusissamisoorluinnarluni.

ESU-mik taarsigassarsitsisarnerup pilersinneqaqqinnissaanik kissaateqarnerq paasilluarsinnaavarput. Aalisartorpassuit assersuutigalugu aningaaserivik aqutigalugu aningaasalersuinissaminnut ullumikkut periarfissagissaarpallaannginnerinik tamanna ersersitsivoq. Pakatsinermik malitseqarpoq, misigissuserlu tamanna pimoorutissavarput.

Ilutigisaanik suliniutit suut aallartinneqareersimanersut misissussallugit pingaaruteqarpoq. Sinerissap qanittuani aalisartunut atugassarititaasunik pitsanngorsaataasussanik, Naalakkersuisut massakkut suliniuterpaalunnik suliaqarput. Tassunga atatillugu sinerissap qanittuani aalisartut assigiinngitsuummata, assigiinngitsunillu pisariaqartitaqarmata eqqaamassallugu pingaaruteqarpoq.

Aalisartut imminut akilersinnaasumik aalisartut imaluunniit Pisassiissutini Niuerutigineqarsinnaasunik Nammineq Pigisanik (PNNP) peqarlutik aalisartut angallatiminnik, atortuminnillu ineriartortitsinissaminnut aamma nutaannguissaminnut aningaasanik taarsigassarsinissaminnut periarfissaqareerput. Kisianni aamma aningaasanik pisariaqartinneqartunik taarsigassarsitinneqarnissaminnik periarfissaqanngitsunik aalisartoqarlunilu piniartoqarpoq. Tassanilu inuussutissarsiutini siuarsaanissamut taarsigassarsiissutit ukkatarissanerlugit apeqqutaavoq.

Tassani taarsigassarsianit taarsersorlugit akilersorneqartussaasunit tapiissutit, pitsaanerusumik periarfissaanerlutik Naalakkersuisut isumaqatigaagut. Inuussutissarsiutini siuarsaanissamut



taarsigassarsiissutit ineriartortinnagit, tapiissuteqartariaatsip ineriartortinneqarneratigut allaffissornermi ullumikkut nukiit atorineqartut attatiinnarneqarsinnaapput, tassuunakkullu nukiit aalisartunut aamma piniartunut pitsaanerpaamik iluaqutaasussanngorlugit atorineqarlutik.

Aaqqiissutissamik siunissamut qaninnerusumuinnaq iluaqutaasussaanngitsumik, siunissamulli ungasinnerusumut aamma iluaqutaasussamik nassaarnissarput Demokraatini uagutsinnut pingaaruteqarpoq. Sinerissap qanittuani aalisartut, ullullu tamaasa suliaat annertuumik ataqqivagut. Politikikkut eqqumaffigineqartariaqarput, piviusunillu aaqqiissuteqarfigineqarlutik. Kisianni aamma oqaatigissavarput, unamminartoq Naalakkersuisut iliuuseqarfigereerlugu ataatsimut suliniutissaq, inuussutissarsiummut siunissamik pijuartussamik qulakkeerisinnaasoq ineriartortillugu aallartereermassuk.

Siunnersuummi siunertaasunut Demokraatit paasinnipput. Naalakkersuisulli suliasaqarfimmik ukkatarinnereersut, suliniutissanillu ataatsimut isigalugu sinerissami aalisartunut aamma inuiaqatigiinnut siunnersuutigineqartuminngarnit pitsaanerusussanik suliaqarlutik aallartereersut uagutsinnut ersarippoq.

Tamanna tunuliaqutaralugu inassutigineqarpoq, siunnersuut itigartitsissutigineqassasoq.